

# **Gjurmët e Devesë... Zbulo Sekretin e Devesë**

## **PARATHËNIE**

I jam mirënjohës Mbretit të Arabisë Saudite, Fahd, Fondacionit Islamik dhe të tjerëve që kanë përkthyer Kur'anin në të gjithë gjuhët e botës. Ndihem i bekuar ndërsa e lexoj Kuranin në gjuhën e nënës time. Meqënëse më pak se 20% e muslimanëve në të gjithë botën e kanë arabishten gjuhën e nënës së tyre, ndiej një trishtim në zemër kur shikoj se shumica e tyre mbështeten te dikush tjetër për t'ju shpjeguar Kur'anin. Me fjalë të tjera, ata dëgjojnë mesazhin e Kur'anit përmes këndvështrimit të një tjetri. Por sot kjo nuk është më e nevojshme.

Allahu dëshiron që vetë JU të kuptoni mesazhin e Tij. Si mundet që ne t'i bindemi Atij nëqoftëse nuk kuptojmë qartë se çfarë thotë Ai? Muslimanët që jetuan para kohës së profetit Muhamed kuptuan se çfarë tha Allahu, sepse Allahu u foli atyre në gjuhën e tyre. Kjo histori sqaron nevojën e të kuptuarit qartë të mesazhit të Allahut.

Një pronar arab i një fabrike veshjesh, në Indi, u shkroi një letër, në arabisht, punonjësve të fabrikës për t'ju thënë se ata duhej të ndalonin prodhimin e bluzave me ngjyrë të kuqe dhe të fillonin prodhimin e bluzave me ngjyrë të verdhë. Përveç kësaj, ata do të merrnin një shpërblim në fund të muajit, nëse do të bënin punë të mirë. Pronari arab nuk fliste as

gjuhën Urdu dhe as gjuhën Hindu, por përgjegjësi i fabrikës fliste gjuhën Arabe, Urdu dhe atë Hindu.

Përgjegjësi indian i fabrikës ua lexoi letrën punëtorëve ashtu siç ishte, në arabisht dhe mandej e vendosi atë mbi tavolinë, në sy të punëtorëve. Punëtorët ishin të kënaqur që pronari u kishte dërguar një letër, por megjithatë nuk ndryshuan prodhimin e bluzave nga të kuqe në të verdhë. Kur pronari i fabrikës zbuloi se fabrika e tij ende ishte duke prodhuar bluza të kuqe u zemërua shumë me përgjegjësin e fabrikës dhe punëtorët. Ai vendosi të punësojë një përgjegjës të ri për fabrikën dhe punëtorë të rinj. Pronari arab dëshironte që të punonte me njerëz që kuptonin qartësisht urdhërat e tij. Përveç kësaj ai ishte i gatshëm për të bekuar me një shpërblim ata që do ti bindeshin urdhërave të tij.

Mos humbisni bekimet e Allahut. Mos u mbështesni te dikush tjetër për të kuptuar mesazhin e Allahut. Ju lutem, gjeni një Kur'an të përkthyer në gjuhën tuaj dhe së bashku le të zbulojmë një thesar që do t'ju ndryshojë jetën.

## **MUSLIMANË "PAKKA"**

### **ALI IMRAN 3: 42-55**

Ndërsa isha duke lexuar Kur'anin, në gjuhën time, erdha te një pjesë e cila më mbushi zemrën plotë me shpresë. Edhe ju, gjithashtu, mund të përjetoni të njejtën shpresë pasi të mbërtheni të vërtetën e Suretu Ali Imran 3:42-55. Fakti që jo çdo njeri ka sy të shikojë të vërtetën, në këto ajete, më lëndon

zemrën. Lutem që Allahu do tu hapë sytë që të njihni të vërtetën.

Lexo Suretu El Maide 5:83 "Kur e dëgjojnë atë që i është zbritur të dërguarit (*Kur'anin*), prej syve të **tyre** rrjedhin lotë, ngase e kanë kuptuar të vërtetën, e thonë 'Zoti ynë, ne kemi besuar, pra na regjistro ndër ata që dëshmojnë'."

Kush janë "**ata**" në këtë ajet? Kush janë njerzit që janë në gjendje të njohin të vërtetën e Allahut? Të vërtetën do ta gjejmë te Suretu Ali Imran.

E kam lexuar më shumë se njëqind herë Suretun Ali Imran 3:42-55. Çdo herë ndiej të njetin gëzim që ndieva herën e parë kur zbulova të Vërtetën në këtë pjesë. Zbulimi që bëra nuk ishte diçka e re. Shumë njerëz në histori kanë bërë të njetin zbulim sepse sytë e tyre ishin të hapur ndaj së Vërtetës. Çdo ditë Allahu hap me qindra sy të vëllezërve muslimanë, ndërsa ata lexojnë Suretun Ali Imran 3:42-55. Ata që e kuptojnë këtë të Vërtetë e quajnë veten "Pakka" që do të thotë muslimanë të "plotë".

Allahu është duke e vërtetuar të Vërtetën që shpallet te Suretu Ali Imran 3:42-55, duke u folur shumë muslimanëve përmes ëndrave. Një studim mbarëbotëror i kohëve të fundit është bërë me 600 "Pakka" dhe 150 prej tyre thanë se ata u bënë "Pakka" përmes një ëndre në të cilën u ishte shfaqur një lajmëtar i Allahut dhe u kishte pohuar të vërtetën e Suretu Ali Imran 3:42-55. Disa muslimanë "Pakka" kanë pasur ëndra ku kanë parë dhe dëgjuar profetin Muhamed, paqja qoftë mbi të, që u ka pohuar të Vërtetën që po prezantojmë në këtë libërth. Në një nga librat e shenjta, një ajet thotë, "Ju do ta njihni të

Vërtetën dhe e Vërteta do t'ju çlirojë". A dëshironi të njihni të vërtetën dhe të çliroheni?

Merrni atëherë pak kohë, hapeni Kur'anin dhe lexojeni këtë pjesë të mrekullueshme, ajet për ajet. Unë kam siguruar për ju shpjegimet e duhura për çdo ajet dhe lutem që sytë tuaj do të hapen e do të kuptoni këtë të Vërtetë duke u bashkuar, mandej, me lëvizjen e muslimanëve Pakka.

## **SHPJEGIM**

Suretu Ali Imran 3: 42. "Përkujto kur engjëjt i thanë: 'Oj Merjeme, Allahu të dalloj ty (*me besim e karakter*), të pastroi (*nga shpifjet ebreje*) dhe të lartësoi mbi gratë e botës.

Suretu Ali Imran 3: 43. Oj Merjeme, vazhdoje adhurimin ndaj Zotit tënd, bën sexhde dhe falu për Zotin bashkë me ata që falen'!"

Përpara se të shkruhej Inxhili, për një periudhë prej 400 vjetësh, populli i përmendur në këtë Shkrim nuk kishte ndonjë profet që t'u fliste. Populli i Allahut kishte rënë në fundin e humnerës së dëshpërimit dhe pa shpresëshmërisë.

Pikërisht në këtë moment të errët të historisë së njerëzimit Allahu bëri diçka të jashtëzakonëshme. Ai i foli me anë të engjëllit Xhibril një virgjëreshe të re, të quajtur Merjeme. Engjëlli i tregoi asaj që Allahu e kishte zgjedhur atë për një detyrë të veçantë. Por më së pari Merjema duhej të ripohonte thirrjen e saj si një muslimane e vërtetë. Asaj iu kërkua që të përkushtonte plotësisht veten në bindje ndaj Allahut.

Suretu Ali Imran 3: 44. "Këto janë nga lajmet e fshehta (të *hershme*) që po t'i shpallim ty. Ti nuk ishe ndër ta kur i hidhnin shortet se kush prej tyre do të bëhej kujdestar i Merjemes, nuk ishe pranë tyre as kur ata ziheshin mes vete."

Kur'anit na jep mundësinë për të parë se çfarë ndodhi në qiell midis engjëjve. Duket sikur të gjithë engjëjt dëshironin që t'ju jepej detyra për të qenë roje të Merjemes. Për të zgjidhur këtë çështje engjëjt hodhën short për të parë se kujt do ti jepej kjo detyrë.

Asnjë pjesë tjetër e Kur'anit nuk na flet për kaç shumë ngazëllim në qiell. Allahu ishte gati të bënte diçka shumë të veçantë për gjithë njerëzimin, diçka që nuk e kishte bërë kurrë më parë, apo do ta bënte më vonë.

Suretu Ali Imran 3: 45. "Përkujto kur engjëjt i thanë: 'Oj Merjeme, Allahu të përgëzon me fjalën e vet (*me lindjen e një fëmije si rezultat i fjalës së Zotit*) emri i të cilit është Mesih, Isa, bir i Merjemes, i famshëm në dynja e ahiret dhe nga të afërmit (e *Zotit*)'."

Ajeti 45 është lajmërimi i Merjemes që ajo ishte zgjedhur për të lindur profetin Isa. Muslimanët në mbarë botën kanë dy emra për profetin Isa. Ne e quajmë atë "Isa Kalimatullah" (*Fjala e Allahut*) dhe "Isa Ruhullah" (*Shpirti i Allahut*). Përse e thërrasim profetin Isa me këto dy emra?

Përgjigjet janë te Suretu Ali Imran 3:45 dhe El Enbija 21:91. Allahu tha që Ai do të vendoste Fjalën e tij në Merjemen. Çfarë ose kush është "Fjala" e Allahut? Për të kuptuar më mirë këtë lexo Suretu El

Enbija 21:91 "(Përkujto) Edhe atë që ruajti nderin e saj, e Ne e frymëzuam atë me shpirt (*barrë*) nga ana Jonë dhe atë edhe të birin e saj; bëmë mrekulli për njerëzit". Pse i referohemi profetit Isa si "Isa Kalimatullah" dhe "Isa Ruhullah"? Kur'ani e bën të qartë këtë gjë, "Isa është Fjala (*Kalim*) dhe Shpirti (*Ruh*) i Allahut. Asnjë person apo profet tjetër nuk i ka këta tituj.

"Fjala" dhe "Shpirti" i Allahut që u vendosën brenda Merjemes u bënë mish në formën e një foshnje. Ai i tha Merjemes që ta quante foshnjen 'Isa Mesih'. Mesih do të thotë "i vajosuri apo i premtuari". 758 vjet para lindjes së Isas, profeti Isaia shkruajti "...e virgjëra do të mbetet me barrë dhe do të lindë një fëmijë të cilin do ta quajë Emanuel" (Isaia 7:14). "Emanuel" është fjala hebraisht për "Allahu me ne".

Isa do të ishte i nderuar nga të gjithë njerëzit në këtë botë dhe përgjithmonë në qiell, si dhe do të jetë më i afërti i vetë Allahut. Vetë Kur'ani jep një përshkrim të Isas për ne. Ai është Fjala e Allahut, Shpirti i Tij, i vajosuri i premtuar dhe "një shenjë për (*gjithë*) kombet" (El Enbija 21:91). Kur duam që të shkojmë diku, ku nuk kemi qenë më parë, ne kërkojmë për një shenjë që të na drejtojë për atje. Ku do të shkojmë në se ndjekim Isa?

Suretu Ali Imran 3: 46. "E që duke qenë në djep (*foshnje*) u flet njerëzve, e edhe si i rritur e që është nga të përsosurit".

Lindja e Isas do të ishte një mesazh për të gjithë botën dhe ai do të ishte i drejti. Sa i drejtë ishte Isa? Allahu i tha Merjemes, Suretu Merjem 19:19, se "Isa

do të ishte "...një djalë i pastër...". Inxhil na mëson se Isa kurrë nuk vrau ndonjë njeri, nuk kishte etje për para, kurrë nuk u martua, foli kundër korrupsionit midis udhëheqësve fetarë, u lut çdo ditë, agjëroi për 40 ditë dhe netë duke mos ngrënë asnjë gjë dhe na mësoi që të duam armiqtë tanë. Në se Isa do të kishte kryer edhe një mëkat të vetëm ai nuk do të ishte më Fjala ose Shpirti i Allahut dhe nuk do të ishte ngjitur në qiell për të qenë bashkë me Të. Nëpërmjet Isas, Allahu i tregoi botës se si duhej të jetonin muslimanët "Pakka". Bota do të ishte e mrekullueshme në se të gjithë ne do të jetonim jetët tona ashtu si vetë Isa.

Suretu Ali Imran 3: 47. "Ajo tha: 'Zoti im, si mund të kemë unë djalë e mua s'më ka prekur njeriu (*nuk jam e martuar*)?' Ai (*Allahu*) tha: Ja, kështu, Allahu krijon çka të dojë. Kur Ai vendos për një çështje, vetëm i thotë: Bëhu! Ajo menjëherë bëhet".

Merjema u trondit nga lajmi që i dha Allahu. Ajo i tha Atij se "...si mund të kemë unë djalë e mua s'më ka prekur njeriu...?" Allahu u tregua i duruar me Merjemen dhe iu përgjigj, "Unë jam Allahu; për mua është e lehtë të bëj atë që dua".

Duke ditur që Allahu nuk bën asnjë gjë rastësisht dhe gjithçka që Ai bën është sipas planit të Tij të përsosur, **pse Allahu do të lindte Isën pa baba tokësor?** A ka pas ndonjë profet tjetër që ka lindur pa baba tokësor? Çfarë kuptimi ka kjo ngjarje për gjithë muslimanët?

Për t'iu përgjigjur këtyre pyetjeve duhet të shikojmë me kujdes jetën e Ademit. Te Suretu Ali Imran 3:59 Kur'ani thotë që Isa është njësoj si Ademi.

Ata ishin të ngjashëm pasi sejcili prej këtyre profetëve nuk kishte baba tokësor. Para se Ademi të rebelonte kundër Allahut ai shëtiste bashkë me Allahun në kopësht (xhennet). Ademi mund të jetonte në praninë e Allahut përjetësisht dhe të bisedonte me Të sepse nuk kishte ndonjë mëkat, ashtu si Isa. Ademi, në fillim, ishte i drejtë dhe i shenjtë sepse ai ishte krijuar nga Ruhullahu i Allahut. Atëherë kur Ademi nuk iu bind më Allahut u bë i pa shenjtë, mëkatar, dhe nuk mund të jetonte më me Allahun në kopësht (xhennet).

Lexo Suretu Ta Ha 20: 121. "Ata të dy hëngrën nga ajo (*pemë*) dhe që të dy u zhveshën, e ia nisën ta mbulojnë veten e tyre me gjethe që mblihdnin nëpër xhennet, dhe kështu Ademi theu urdhërin e Zotit të vet dhe gaboi."

Padyshim që të gjithë ne jemi fëmijë të Ademit, përveç njërit – emri i tij është Isa Mesih. Pema e mollës prodhon vetëm mollë! A mundet që një pemë molle të prodhojë portokalle? Të gjithë njerëzit e lindur prej familjes së Ademit trashëgojnë natyrën e Ademit. Mallkimi i mëkatit, në Ademin, është trashëguar në pasardhësit e tij. Isa është i vetmi njeri që nuk mëkatoi kurrë. Ai nuk mëkatoi sepse nuk ishte i lindur si pasardhës i linjës së gjakut të Ademit. Prandaj dhe nuk trashëgoi natyrën mëkatore të Ademit.

Një ditë me pyeti një shok: "Përse Isa nuk trashëgoi natyrën mëkatore përmes linjës së nënës së tij Merjemes?" Përgjigja ime ishte në dy pjesë. Së pari, në Tevrat Sharif, profeti Musa shkroi se natyra e mëkatit trashëgohet vetëm përmes linjës së gjakut të



babait. Së dyti, mjekët thonë se kur një foshnje është brenda trupit të nënës gjaku i tyre kurrë nuk përzihet. Në se do të ndodhte, kjo do të vdisnin që të dy. Është, gjithashtu, e njohur se një nënë mund të mos ketë të njëtin tip gjaku me foshnjen e vet. Allahu e krijon gjakun e foshnjes prej farës së burrit. Tani a e kuptoni pse unë pëlqej të lexoj Kur'anin? Zbulimi që Isa është Fjala dhe Shpirti i Allahut, që ai ishte i premtuari i vajosur dhe që ishte pa mëkat më ka ndriçuar mendjen. Por ka edhe më shumë...

Suretu Ali Imran 3: 48. "Ai (*Allahu*) ia mëson atij librin (*besimin*), urtësinë, Tevratin dhe Inxhilin".

Allahu i mësoi Isas Librin e shenjtë. Muslimanët Pakka i lexojnë dhe kuptojnë të **gjithë** Librat. Allahu e udhëzoi Muhamedin, paqja qoftë mbi të, se në se do të kishte ndonjë pyetje mbi mesazhet prej qiellit, Ai duhej të kërkonte përgjigje midis atyre që e kishin lexuar "**Më Parë**" Librin. Unë vetë kam gjetur Librin e Urtësisë (Mesal), Tevratin dhe Inxhil Kitab. Këta libra janë përkthyer direkt nga gjuha origjinale dhe janë të besueshëm. Një miku im tha se leximi i Librave "Të Mëparshëm" e bën atë të ndihet musliman i plotë. Një lopë nuk mund të qëndrojë me një këmbë, por kur qëndron mbi të katër këmbët ajo është e fortë. Një musliman "Pakka" i lexon të gjithë Librat.

Suretu En Nisaë 4: 136. "O ju që besuat, besoni vazhdimisht Allahut të dërguarit të Tij, librit që gradualisht ia shpalli të dërguarit të Tij dhe librit që e pat zbritur më parë. Kush nuk i beson Allahut, engjëjve të Tij, librave të Tij, të dërguarve të Tij dhe botës tjetër, ai ka humbur tepër larg".

A kanë ndryshuar Librat e "Mëparshëm"? Kurani thotë "Jo"! A është Allahu i pafuqishëm për të mbrojtur mesazhin e Tij?

Lexo në Kur'an Suretu El En'amë 6: 114- 115. "...Atyre që u dhamë librin e dinë se ai (*Kur'ani*) është i zbritur prej Zotit tënd saktësisht, pra mos u bëj prej atyre që dyshojnë. Fjalët e Zotit tënd janë plot të vërteta (*çka lajmërojnë*) dhe plot të drejta (*çka gjykojnë*). S'ka kush që të ndryshojë fjalët (*vendimet*) e Tij. Ai është që dëgjon e di".

Në se dikush ju thotë që Librat janë ndryshuar, pyeteni "A ka prova që Librat janë ndryshuar?" Përgjigja e tyre është e njëjtë, "Jo, nuk kam prova, vetëm se kam dëgjuar që janë ndryshuar". Ky lloj argumentimi nuk mund të qëndrojë sikur ta dëgjonim në një sallë gjyqi.

Suretu Ali Imran 3: 49. "Dhe, të dërguar te bijt e israilit: unë kam ardhur nga Zoti juaj me argument, unë nga balta ju bëj diç si shpendi, i fryej atij dhe ai me lejen e Allahut bëhet shpend, unë i shëroj të verbërit, të sëmurit në lëkur, dhe unë me lejen e Allahut ngjalli të vdekurit: unë ju tregoj për atë që e hani dhe për atë që e depononi në shtëpitë tuaja. Vërtet, ky është fakt për ju nëse jeni besimtarë".

Kur lexova, për herë të parë, historinë e Isas i cili bëri një zog të gjallë prej argjilës, mendova për historinë kur Allahu krijoi Ademin. Sipas kësaj historie, Allahu i dha Isës fuqinë për të krijuar jetë. Me fuqinë e Allahut, Isa shëroi gjithashtu lebrozët, të verbërit, të çalët dhe madje ktheu të VDEKURIT NË JETË.

Pas leximit të këtij ajeti, shpirti mu mbush plot e përplot me shpresë. Isës i janë dhënë çelësat dhe fuqia mbi jetën dhe vdekjen. FUQI MBI VDEKJEN, kjo është e mahnitëshme! Më parë unë kisha menduar se vdekja ishte armiku im më i madh në botë, por tani e kuptoj nga Kur’ani që Isës i është dhënë fuqia mbi vdekjen. Bota ka qënë duke pritur për një profet që mundet të mposhti armikun tonë më të madh dhe përfundimtar, vdekjen. Në se Isës i është dhënë fuqia mbi jetën dhe vdekjen, çfarë mundet që të bëjë ai për ne?

Suretu Ali Imran 3: 50 “Dhe (*kam ardhur*) që t’ju vërtetoj Tevratin që e keni para duarsh, t’ju lejoj disa që u ishin ndaluar juve, kam ardhur me argument nga Zoti juaj, pra kinie frikë Allahun dhe më dëgjoni mua”.

Isa tha se jeta e tij vërtetohet dhe pohon atë që profetët kishin parathënë për të, në “Librat e Mëparshëm”. Profetët e vjetër folën shumë rreth Isa Mesih. Kur lexoj “Librat e Mëparshëm”, të cilët janë përkthyer nga gjuha origjinale, shikoj mbi treqind profeci (parathënie) për Isën. Isa ka thënë se detyra jonë ndaj Allahut është që ti bindemi atij (Isës)! Pra që të tregoni respektin tuaj më të madh për Allahun duhet ti bindeni Isës. I vetmi urdhërim i Isës, që gjejmë në Kur’an, është këtu te Suretu Ali Imran 3:50. Urdhëri është i qartë, “Bindmuni mua” (Isa). Më vonë do të shikoni një premtim të mrekullueshëm bekimi, për ata që i binden Isës. Po ku i gjejmë urdhërimet e Isës? Ato gjenden në Inxhil. Si mundet që të përmbushni detyrimet ndaj Allahut dhe ti bindeni Isës përderisa nuk dini çfarë ju ka urdhëruar të bëni?

Ju duhet të gjeni se çfarë thotë Inxhili, me qëllim që të dini se si ti bindeni Isës. Edhe sot është i njëjti Inxhil që përdori dhe Muhamedi, paqja qoftë mbi të. Kur të gjeni një Inxhil shikoni që të siguroheni në se është përkthyer nga gjuha origjinale, i shkruar në pergamenë që nga shekulli i parë.

Suretu Ali Imran 3: 51. "Allahu është Zoti im dhe Zoti juaj. Adhuronie Atë; Kjo është rrugë e drejtë!"

Një rrugë apo një shteg gjithmonë na çon diku apo te dikush. Rruga e Drejtë (Tarika) e përmendur në këtë ajet është rruga që na çon te Allahu. Është një rrugë e drejtë dhe direkte për te Allahu. Në të nuk ka shmangie apo shtigje që presin shkurt. Është një rrugë e drejt për drejtë, që do të thotë se nuk mbaron kurrë para qëllimit të përcaktuar, që është parajsja. Pra, kush mund të ecë në këtë rrugë për te Allahu?

A keni dëgjuar ndonjëherë ndonjërin të thotë "Në se unë bëj mjaft vepra të mira, Allahu do të më lejojë që të shkoj në qiell pas vdekjes dhe të jem me Të? Ai që thotë kështu është i verbër dhe fyen shenjtërinë e Allahut. Nuk ka rëndësi se sa vepra të mira mund të bëni sepse kurrë nuk mund të largoni mëkatin prej vetes. Allahu është 100% i shenjtë dhe asnjë mëkat nuk mund të hyjë e qëndrojë në praninë e Tij. Kujtoni që Ademi u përzu nga prania e Allahut për shkak të një mëkati. Njerzit 99.9% të shenjtë nuk mund të hyjnë në parajsë (xhennet). Në të vërtetë nuk ka shenjtëri 99.9%, shenjtëria është gjithnjë 100% e tillë. Vetëm njerëzit të cilëve u është hequr mëkati mund të shkojnë në parajsë (xhennet) e të jenë me Allahun. Ky është një lajm i keq për ne,

sepse që të gjithë kemi mëkatuar. Shpresa jonë e vetme është që Allahu do të krijojë një rrugë, për ne, që të jemi plotësisht të pastruar prej mëkatit dhe natyrës sonë mëkatore.

Suretu Ali Imran 3: 52. "E kur e kuptoi Isai vendosmërinë e tyre në mosbesim (*dhe qëllimin që ta mbysin*) tha: 'Kush janë ndihmëtarët e mij për në rrugë të Allahut?' Havarijjunët thanë: 'Ne jemi ndihmëtarë të fesë së Allahut, ne i besuam Allahut, e ti dëshmo për ne se jemi muslimanë (*të bindur, të dorëzuar*)".

Suretu Ali Imran 3: 53. "Zoti ynë, ne e besuam atë që e zbritte (*shpalljen*), e pasuam të dërguarin (Isain), pra shënona bashkë me ata që dëshmojnë (*besimin e drejtë*)!"

Në mënyrë që ti bënte të gjithë njerëzit e botës të adhurojnë vetëm Allahun Isa kërkoi disa ndihmës. Një grup i vogël njerëzish dolën para duke thënë se ishin muslimanë dhe ata do ta ndihmonin Isën. Ata thanë që besonin në mesazhin dhe të dërguarin (Isën) që Allahu kishte dërguar në tokë. Ndjekësit e Isës janë muslimanë!

Suretu Ali Imran 3: 54. "E ata (*jehuditë*) i kurdisën një dredhi (*mbytjen e Isait*), Allahu iu kundërvu dredhisë së tyre, Allahu është asgjësuesi më i fuqishëm kundër atyre që bëjnë dredhi".

Satani (shejtani) e urren të vërtetën dhe do të bëjë gjithçka që mundet për të bërë të mundur që njerëzit të mos e dëgjojnë atë. Për sa kohë e keni lexuar Kuranin dhe ende nuk e keni kuptuar Suretun Ali Imran 3:42-55? Satani (shejtani) nuk do tja dijë në se mund të **lexoni** Kuranin, ai shqetësohet shumë në

se ju e **kuptoni** atë. Allahu nuk do ta lejojë satanin (shejtanin) që të fitojë. Ai ka një plan për t'ua bërë të njohur të vërtetën të gjithë njerëzve në botë.

Për vdekjen e Isës kishte dy plane. Fundamentalistët hebre kishin plan për ta vrarë dhe Allahu kishte një një plan tjetër. A thotë Kur'anin që "Isa nuk vdiq?" Jo. Suretu En Nisaë 4:157 thotë se hebrenjtë thanë që ata nuk e vranë apo kryqëzuan atë. Vini re që ajeti nuk thotë se "Isa nuk vdiq". Kujtoni gjithashtu që hebrenjtë nuk ishin të lejuar të vrisnin dikë, vetëm romakët mund ta bënë këtë gjë. Nëse mendoni se Kurani thotë se Isa nuk vdiq lexoni ajetin tjetër.

Suretu Ali Imran 3: 55. "*Përkujto o i dërguar*) Kur Allahu tha: 'O Isa, Unë po të marr ty, po të ngris tek Unë, po të shpëtoj prej (*sherrit*) atyre që nuk besuan. E ata që të besuan ty, do t'i ngris lart mbi ata që nuk besuan deri në ditën e kijametit, pastaj vetëm tek Unë është kthimi juaj, e Unë gjykoj mes jush për atë që kundërshtoheshit'."

Kërkojini imamit tuaj që tua lexojë në arabisht ajetin 55 dhe dëgjojeni me kujdes ndërsa ai e lexon. Ju do ta dëgjoni atë të shqiptojë fjalën arabe "mutauafika". Rrënja e kësaj fjale është "tauafa" dhe kuptimi i saj është "të vdesësh" apo "ti shkaktosh vdekjen dikujt". Fjala "tauafa" është përdorur 26 herë në Kuran. 24 herë është përkthyer "të vdesësh" apo "ti shkaktosh vdekjen dikujt" dhe dy herë është përkthyer "të flesh" por kurrë nuk është përkthyer "të marr". Përkthyesit duhet të jenë të kujdesëshëm, me qëllim që ta përkthejnë besnikërisht Kur'anin, në gjuhët e tjera. Për këtë arsye ajeti 55 duhet të

përkthehet besnikërisht në këtë mënyrë "Kur Allahu tha: 'O Isa unë do të bëj që ti të vdesësh dhe pastaj do të ringjall pranë vetes...". Te Suretu Merjeme 19:33 Isa thotë për veten e tij "Selami (*shpëtim prej Allahut*) është me mua ditën kur u linda, ditën kur të vdes dhe ditën kur të dal (*prej varrit*) i gjallë". Ringjallje do të thotë "ngritje prej vdekjes". Ky ishte plani i përsosur i Allahut. Por pse Allahu do ta vriste Isën? Kësaj pyetje do ti përgjigjem më tej.

Ku ndodhet Isa tani? Ajeti 55 shpall se Isa u ringjall për të qenë me vetë Allahun. Kujtoni që Allahu është 100% i shenjtë. Në se dikush është sjellë pranë vetë Allahut, ai duhet të jetë 100% i shenjtë. Askush që është mëkatar apo i lig nuk mund të vejë në praninë e vetë Allahut.

Kjo është përmbledhja e jetës së Isës:

- Lindi pa trashëguar natyrën mëkatore të Ademit.
- Jetoj një jetë të shenjtë e pa mëkat.
- Allahu i dha atij fuqi mbi jetën dhe vdekjen.
- Isa eci nëpër rrugën e drejtë (Tarika) për te Allahu.
- Isa është tani me vetë Allahun.

Kjo është e vërteta që na vjen drejt për drejt nga Kur'ani dhe muslimanët Pakka e kuptojnë këtë të vërtetë.

Në Inxhil Isa ka bërë një pohim të guximshëm për veten e tij. Ai tha "Unë jam Rrugja, e Vërteta dhe Jeta". (Jahja 14:6) Suretu Al-Imran 3:42-55 vërteton Inxhilin kur thotë se "Isa e njeh rrugën për te Allahu sepse ai eci nëpër rrugën e Drejtë (Tarika) për te Ai." Isa është e Vërteta sepse ai është Fjala e Allahut.

Fjala e Allahut është gjithnjë e vërtetë. Isa është jeta sepse atij iu dha fuqi mbi jetën dhe vdekjen.

## RRUGA E DREJTË (TARIKA) PËR NË QIELL

Të verbërit kanë nevojë për të ecur. Pas leximit të Suretut Ali Imran 3:42-55 e ndjeva veten si një të verbër "shpirtëror". Natyra ime e ligë dhe mëkatore më kishte penguar të shikoja rrugën e Drejtë (Tarika) për në qiell. Unë kisha nevojë për dikë që të më ndihmonte, për dikë që njihte rrugën. Një i verbër tjetër ishte i pa dobishëm për mua. Ky duhej të ishte dikush që kishte ecur më parë nëpër rrugën e Drejtë (Tarika) dhe që qiellin e kishte shtëpinë e tij.

A mundet që Isa të na ndihmojë të shkojmë në qiell? Unë besoj se Sura Ali Imran 3:42-55 është një mesazh i veçantë nga Allahu. Ky mesazh i mrekullueshëm na tregon për një profet që erdhi prej qiellit, jetoi si njeri dhe u kthye prapë në shtëpinë e vet, në qiell. Po, unë besoj që Isa mund të na ndihmojë.

Në fillim të këtij libërthi ju prezantova një ajet nga Kur'ani dhe mandej ju bëra një pyetje. Tani është koha për përgjigjen e saj.

Suretu El Maide 5: 83 "Kur e dëgjojnë atë që i është zbritur të dërguarit (*Kur'anin*), prej syve të tyre rrjedhin lotë, ngase e kanë kuptuar të vërtetën, e thonë: 'Zoti ynë, ne kemi besuar, pra na regjistroni ndër ata që dëshmojnë (*ndër ymetin e Muhamedit*).'"

Pyetja ishte se "Kush janë '**Ata**' në këtë ajet?" përgjigja është, "Ndjekësit e Isës, ata që quhen 'Pakka' ose muslimanë të 'Plotësuar'.



## SI MUND TË NDIQNI ISËN PËR NË QIELL

Allahu ju do dhe dëshiron të bashkoheni me Të në qiell, pas vdekjes. Por që të shkoni në qiell duhet që mëkatet tuaja të largohen plotësisht prej jush. Për të zgjidhur këtë problem, Allahu bëri një rrugë që ne mund të jemi të falur plotësisht dhe mallkimi i mëkatit të largohet prej nesh. Duke filluar me Ademin, njeriu mund të jetë i falur prej mëkateve të tij nëqoftëse ai ndjek sistemin e sakrificës, të quajtur "Kurbani". Me mëkatet e falura dhe të larguara prej tij, ai mund të bashkohet me Allahun në qiell, menjëherë pas vdekjes.

Kurbani është një paraqitje e dënimit që ne meritojmë për shkak të mëkateve tona. Mendoni për një sallë gjyqi në të cilën ju vetë qëndroni përpara gjykatësit. Gjykatësi është i ndershëm dhe i drejtë. Për shkak të mëkatit gjykatësi vendos që ju duhet të vdisni. Nëse Allahu nuk do të jepte këtë dënim, Ai nuk do të ishte më një gjykatës i drejtë. Drejtësia është që çdo krim duhet shpague. Ju e meritoni të vdisni për shkak se jeni fajtorë për mëkatin tuaj. Le ti kthehmi praktikës së Kurbanit. Mendoni pak për të. Së pari duhet që të gjejnë një kafshë të pastër. Një kafshë e sëmurë apo jo cilësore nuk mund të përdoret për sakrificë. Në momentin para se të bëjmë sakrificën ne duhet që ti lutemi Allahut, në këtë mënyrë: "O Allah, unë jam fajtor për shkak se kam kryer mëkat kundër teje. Unë e meritoj që gjaku im të derdhet, deri sa unë të vdes. O Allah, të lutem

ki mëshirë për mua dhe në vend të gjakut tim prano gjakun e kësaj kafshe të pafajshme”.

Kurbani ka qenë praktikuar që nga koha e Ademit e deri në atë të Isës. Allahu nuk ka kërkuar gjithnjë që për Kurban të përdorej vetëm gjaku i kafshëve. Ibrahimit iu kërkuua që të bënte Kurban birin e tij, që vetë Allahu ia kishte premtuar. Në momentin e fundit Allahu e ndaloi Ibrahimin që të bënte Kurban të birin. Kështu Allahu ishte duke vënë në provë dashurinë dhe përkushtimin e Ibrahimit ndaj Tij.

Muslimanët Pakka kanë një kuptim të plotë dhe të drejtë për Kurbanin, sepse ata i kanë lexuar që të katër Librat. Ata e dinë se ndjekësit muslimanë të Isës nuk praktikojnë më Kurbanin. Pse? Sepse muslimanët Pakka e dinë që Kurbanin ishte vetëm një figurë e Kurbanit përfundimtar që Allahu do të bënte për të gjithë njerëzit e botës, për ata që kanë qenë, që janë dhe do të jenë në të. Kurbanin që Allahu bëri për gjithë njerëzimin tregon se sa shumë na do Ai dhe kjo na jep sigurinë që ne mund të pastrohemi plotësisht nga mallkimi i mëkatit. Por, çfarë do të përdorte Allahu për Kurbanin e Tij, për gjithë njerëzimin?

Kurani thotë që lindja e Isës do të ishte një shenjë për botën. Me qëllim që Allahu të bënte Kurban për gjithë njerëzimin, kishte nevojë për sakrificën më të pastër, më të shenjtë dhe më të fuqishme që mundej. Kemi parë nga Kur’ani se gjaku më i pastërt, më i shenjtë dhe më i fuqishëm në botë ishte ai i Isës. Allahu e bëri Kurbanin duke përdorur gjakun e pafajshëm të Isës.

Atë çfarë Allahu nuk lejoi që të bënte Ibrahimimi me birin e premtuar, Ai e bëri me Isën. Kjo ishte një vepër dashurie e pa shoqe me gjithçka tjetër që njerzimi ka parë ndonjëherë, i pafajshmi dha gjakun e tij për fajtorët. Isa mori mbi vete ndëshkimin që meritonim ne. Tani, e kuptoni pse muslimanët Pakka janë njerëz kaq mirënjohës. Ata e kuptojnë se Allahu nuk na dha atë që meritonim. Inxhili thotë te Jahja 15:13 "Askush s'ka dashuri më të madhe nga kjo: të japë jetën e vet për miqtë e tij."

Sot ju mund të bëheni një musliman Pakka. Gjithçka që duhet të bëni është të besoni se Allahu bëri një Kurban për ju dhe përdori gjakun e Isës në vend të gjakut tuaj. Ndaluni për një çast, shtri duart para dhe me përlulje tregoi Allahut që e pranoni Kurbanin e Tij dhe falenderojë që e hodhi mbi Isën ndëshkimin për mëkatit tënd. Në këtë mënyrë Allahu do të të falë nga mëkatet e tua dhe do të largojë prej teje mallkimin e mëkatit. Vetëm kur do të jesh i pastruar prej mëkateve të tua atëherë mundet që të shkosh në qiell dhe të jesh me Allahun, pasi të vdesësh. Tani ti mund të jetosh jetën në paqe duke ditur që pas vdekjes mund të shkosh drejt te Allahu e të jesh me Të.